

Aningaasaqarnermut Ataatsimiititaliap suliaq nr. 01.31.06/08-00307 pillugu ulloq 11. januar 2008-mi aalajangiinera pillugu Naalakkersuisunut ilisimatitsineq.

(Naalakkersuisut ulloq 20. december 2007-imi aalajangiineranni imm. 2k)

Kalaallit Nunaanni Namminersornerullutik Oqartussat aamma KNI A/S-^{ip} akornanni ikummatissanik imerpalasunik 2008-imiit 2011-imut pilersuinissaq aamma 2008-imiit 2011-imut nioqqutissanik pilersuinissaq pillugit sullissinissamik isumaqatigiissutit akuersissutigineqarnissaat.

Naalakkersuisut **inassutigaaat** ,

- Nioqqutissanik pilersuineq pillugu Kalaallit Nunaanni Namminersornerullutik Oqartussat aamma KNI A/S-ip akornanni 2008-imiit 2011-imut sullissinissamik isumaqatigiissut taamaannermisut Aningaasaqarnermut Ataatsimiititaliamiit akuersissutigineqassasoq,

- Inatsisartut Aningaasaqarnermut Ataatsimiititaliaat aamma Inuussutissarsiornermut Ataatsimiititaliaat tamatuma kingorna isumaqatigiissutit assilineqarnerannik nassinneqarnermikkut ilisimatinneqassasut,

-Isumaqatigiissutit tamatuma kingorna Unammilleqatigiinnermut Ataatsimiititaliamut unammilleqatigiinnermut inatsisip aalajangersagai malillugit nalunaarutigineqassasut.

Aningaasaqarnermut Ataatsimiititaliap oqaaseqaatai

Ukiuni 2008-2011-mi nioqqutissanik pilersuineq pillugu sullissinissaq pillugu KNI-mut nutaamik isumaqatigiissutip Aningaasaqarnermut Ataatsimiititaliamit akuersissutigineqarnissaa Naalakkersuisut suliama matumani qinnutigaaat.

Kangerlussuup Narsarsuullu pilersuisussaatitaanermut ilaatinneqannginnerat piffinnilu taakkunani KNI tapiissutitaqanngitsumik namminerlu akilerlugu akisussaaffigalugulu ingerlatsisoq ataatsimiititaliap maluginiarpaa.

Kiisalu aningaasanut inatsimmi siunniunneqartut naapertorlugit sullissinissamut isumaqatigiissummut akiliutit ingerlaavartumik appartikkiartuaarnissaat ilanngunneqarsimasoq tamatumalu peqatigisaanik Inuussutissat pillugit Siunnersuisoqatigiit kaammattuutaat KNI-p nioqqutissaa taanut ilaatigut ilanngunneqarsinnaasimanerat ataatsimiititaliap iluarisimaarlugu maluginiarpaa.

Kiisalu sullissinissamik isumaqatigiissutip immikkoortuani 2.02-mi kukkuneqartoq ataatsimiititaliap maluginiarpaa. Taamaalilluni 2011-mi sullissinissutinut pisortat akiliutaat 40,1 mio. kr.-iusut kukkusumik allassimavoq. 2008-mili aningaasanut inatsimmi kontomi pingaarnermi 64.10.12-imi, Nioqqutissanik pilersuineranut tunngasumi, 37,0 mio. kr.-iinnaat immikkoortinneqarsimapput. Ukiut sinnerini akiliutissat aningaasanut inatsimmi aningaasaliissutinut naapertuupput.

Sullissinissamik isumaqatigiissummi kukkuneq taama erseqqitsigisoq pisinnaasussaangikkaluarpoq!

Aningaasaqarnermut Ataatsimiititaliap aalajangiinera

Sullissinissamik isumaqatigiissutip immikkoortuani 2.02-mi kukkunerup siuliani tikkuarneqartup isumaqatigiissutip atsiorneqannginnerani aaqqinneqarsimanissaa **tunngavissaatillugu** Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput**

Inussiarnersumik inuulluaqqusillunga

Augusta Salling
Aningaasaqarnermut Ataatsimiititaliap siulittaasua